



Polyanthea Sacra

Ex Universæ Sacræ Scripturæ Utriusque Testamenti Figuris, Symbolis, Testimoniis, Nec Non E Selectis Patrum, Aliorumque Authorum, Sententiis, eruditis Interpretationibus, Similitudinibus, rarisque Historiis collecta, Et Copiosis, Exquisitisque Materiis Moralibus De Virtutibus Et Vitiis Pro ...

Spanner, Andreas

Augustae Vindelicorum, 1702

§. 2. Charitas.

[urn:nbn:de:hbz:466:1-79369](https://nbn-resolving.org/urn:nbn:de:hbz:466:1-79369)

TITULUS XXXVIII.

S. STEPHANUS PROTO-MARTYR.

§. I.

Figura.

Tenuerunt sinistris manibus lampades, & dextris sonantes tubas. Judic. 7. 20. Vide, quàm bene sibi conveniant, prælium Proto-Mar. Stephani, & prælium Gedeonis. Si enim per tubas Prædicatorum voces significatur, tunc B. Stephanus tubâ sonabat, quando incredulos Judæos arguebat. Quando verò prodigia, & signa magna, faciebat; tunc utique lampades in manu tenebat. Tunc autem Judæi sævientes Proto-Martyris lagunculam frugerunt, quando eum lapidaverunt. D. Eusebius Emiff. in Nat. S. Stephani.

Vicit David Goliath lapidibus. 1. Reg. 17. 49. vicit & Stephanus iis quoque diabolum: ille nihilominus quibus percussit; hic autem quibus percussus est. S. Asterius Laudatione S. Stephani.

§. II.

S. Stephani charitas.

Fortis est ut mors dilectio. Cant. 8. 6. Dilectio illius fuit, ad similitudinem mortis, fortis: quia sicut mors animam à corpore sibi dilectissimo dividit; sic amor Stephanum à Mundanis omnibus separavit, & soli Christo eum conjunxit. S. Bonaventura serm. 16. de S. Steph.

Neque, fratres, existimandus est Stephanus tunc inimicos dilexisse, cum pro eis oraret; & non dilexisse, cum, eorum incredulitatem arguendo, corripere. Absit hoc ab anima Martyris ad cælum festinantis. S. Fulgentius f. de S. Stephano. Quia, cum ad cælum festinat, omnes vult habere socios: reprehensio ergo illa fuit ex vehementi charitate erga hostes suos. Sylveira in Act. 7.

Per charitatem pro lapidantibus orabat, nè punirentur. Charitatis virtute subnixus vicit Saulum crudeliter sævientem: & quem in terra habuit persecutorem, in cælo meruit habere consortem. Ipsa scivit charitas desiderando acquirere, quos nequivit moriendo convertere. S. Fulgentius f. de S. Steph. Oecumenius hic putat, non solum Saulum, sed multos alios ex lapidantibus, per Stephani preces, ad fidem conversos, gratiam, ac salutem, consecutos. Sylveira hic.

Stephanus, ut nominis sui coronam meruisset accipere, charitatem pro armis habebat; & per ipsam ubique vincebat. Id. ib.

Vide, quantum agat in pectoribus servorum suorum divina charitatis ardor: quod sperabatur desideris, oculis demonstratur. Necdum explet famulus ministerium, & jam Dominus aperit regnum suum. Euseb. Emiff. hom. de S. Steph.

Vera fortitudo nunquam sine charitate est, & tunc verè in spiritu fortitudinis res agitur: quando fortissima charitatis societate ipsa fortitudo vallatur. Verè constans, & fortis; quem tot lapides depellere non potuerunt ab arce charitatis: in quo dilectio fortis ut mors; imò &

plus, quàm mors. Plus enim apud animam morientis eodem momentò valuit fortitudo dilectionis, quàm fortitudo mortis. S. Rupertus de Aper. S. Spir. 1. 6. c. 6.

§. III.

S. Stephani amor inimicorum, & oratio pro iis.

Domine, nè statuas illis hoc peccatum. Act. 7. 59. Hoc in ipsa cæde, & furore, lapidantium præstare nunquam potuisset; nisi multò antè ista animò percepisset; & in tota vita his cogitationibus versari consuevisset. Isidorus Clarius or. 6. de S. Steph.

Pro se quidem stans oravit, pro inimicis genu flexit: quia ipforum major iniquitas majus supplicandi remedium postulabat. V. Beda hic.

Postis genibus: quia verà, & humili, simplicitate pro se orans stat, & erigitur; pro lapidantibus flestit genua. Quis audivit unquam talem? & quis vidit huic similem? Plus dolet persequentium peccatum, quàm sua vulnera; illorum iniquitatem, quàm suam mortem. S. Bernardus f. de S. Steph.

Quare pro te stans orasti? & pro inimicis genu flexisti? Pro me stans oravi: quia pro me, qui rectè Deo servivi, orando, & impetrando, non laboravi: quia, qui pro iusto orat, non laborat; ideo pro se stans oravit. Ventum est, ut oraret pro Judæis: & attendens, tam multam esse iniquitatem eorum, quæ difficile donari posset, genu flexit, & ait: nè statuas illis hoc peccatum. S. August. f. 1. de S. Steph.

In illa lapidum ruina, quando alius oblivisci poterat etiam charissimos suos; ille Domino commendabat inimicos, S. Maximus hom. in Nat. S. Steph.

Lapides lapidem percutiunt; sed lapidem molliorem; de quo fuit oleum charitatis, & tinnitus redditur pietatis. B. Petrus Dam. f. de S. Steph.

Illi lapides mittebant; & S. Stephanus orationes fundebat. Magna pietas, magna clementia! prorsus qualia in mensa Domini sui comedit, talia & ipse in suo convivio præparavit. S. August. f. 1. de S. Steph.

Cur non vel pauculas horas superstes fuit tam insigni orationi? sed eodem mementò & preces Deo, & animam, obtulit? Respondeo: videretur Stephanus jam plura, & gloriosiora, facere non potuisse, quantumcunque diutius viveret; quàm dum pro inimicis oravit. Quasi hoc solum Deus ad apicem sanctitatis ejus expectasset. Did. Niss. ser. 3. Dom. 3. Quadr. §. 1.

§. IV.

S. Stephanus cur Christum videat stantem?

UNò locò stantem ad dexteram Dei IESUM Stephanus vidisse dixit. Cur ubique ad dexteram federe ostenditur, unò legitur in loco stare? Sedet quasi Judex vivorum, & mortuorum: stat quasi Advocatus suorum. Stabat ergo quasi